

**INATSIARTUT
OMBUDSMANDIATA
UKIUMOORTUMIK
NALUNAARUTAA
2009**

3. Apeqquitit ingerlatsineq pillugu inatsiseqartitsinermut tunngasut pillugit ataatsimoortumik oqaaseqaatit

Ataatsimoortumik ajornartorsiuteqarfiusut sulianik arlalinnik suliarinninninnut atatil-lugu isummerfigisimasama arlallit immikkoortumi matumani erseqqissarneqarnissaat toqqarpara, suliat immikkoortumi 4-mi aamma 5-imi ilanngunnissaat pissutissaqarso-rinngisakka aamma ilanngullugit.

3.1 Kommunip ilitersuisussaataaernerminik eqqortitsinnginnera kiisalu siusinaartumik pensionisiaqalerumalluni qinnuteqaammut atatillugu piffissaq suliamik suliarinnin-nermut atornegartoq sivisooq (j.nr. 2008-120-0005)

A-p piffissaq siusinaartumik pensionisiaqalerumalluni qinnuteqaammi suliarineqarnera-nut K Kommunip atugaa uannut ornigulluni naammagittaalliutigaa.

Suliamik suliarinninnerma kommunip suliamik suliarinninnermut piffissamik sivisuu-mik atuisimanera pillugu isornartorsiuinissannut pissutissaqalersippaanga, tassami A-p ajoqusernera tunngavigalugu nakorsap uppernarsaasiussaata kommunimit tiguneqarne-ranit kommunip suliame pineqartumut tunngasumi aalajangiinissaata tungaanut ukiut si-samangajaat ingerlasimammata.

Aammattaq kommunip ingerlatsivia A-p ajoqusernermi kingornatigut saaffiginninnera-ni sulialluunniit ingerlanerani kingusinnerusukkut A-mut pisariaqarneratut annertutigi-sumik siunnersuisimanginnera ilitersuisimanginneralu isornartorsiorpara.

Aammattaq A suliap ingerlanerani sulisinnaassuseqarsimanginnersoq taamalu suliar-toqquneqarsinnaanerminut piareersimasariaqanngitsoq kommunip aalajangiisimangin-nera isorisariaqartutut isigaara.

Misissuinerani matuma inassuteqaatiginissaanut pissutissaqalersitsivoq, tassalu kommuni periaatsinik oqartussaasut suliamik suliarinninnerannut, ilitersuinissaannik malitseqar-titsinissaannillu piumasaqaatit eqqortinneqarnissaannik qulakkeerisunik atuillassasoq.

Kommuni siusinaartumik pensionisiat pillugit aalajangiisimammat suliame annertuneru-sumik iliuuseqaqqinngilanga.